



5 September 2006 (Selasa)

BPR perlu guna laporan Ketua Audit siasat kes seleweng

KUALA LUMPUR 4 Sept. – Badan Pencegah Rasuah (BPR) sepatutnya menggunakan Laporan Ketua Audit Negara sebagai asas untuk menyiasat sebarang kes penyelewengan dalam jabatan kerajaan. Pengerusi Jawatankuasa Kira-Kira Wang Negara (PAC), Datuk Shahrir Abdul Samad berkata, masalah dibangkitkan laporan itu seharusnya menjadi asas untuk BPR bertindak, malangnya ia tidak dilakukan. “Kita harap BPR mempunyai senaskhah laporan itu dan membacanya.

“Tiada sebab untuk mereka tidak memiliki laporan itu kerana ia adalah dokumen awam dan mereka boleh mendapatkannya daripada Parlimen atau memuat turun daripada internet,” katanya. Beliau berkata demikian kepada pemberita selepas menghadiri sesi taklimat oleh Timbalan Ketua Audit Negara, Datuk Azizah Arshad di Parlimen hari ini. Shahrir bagaimanapun berkata, pihak BPR telah bekerjasama dengan Jabatan Audit Negara dengan memberikan akses kepada fail dan dokumen badan itu.

Mengenai taklimat hari ini, Shahrir berkata, pelbagai isu dibangkitkan termasuk kualiti dan masalah kelewatian dalam projek kerajaan. “Kami diberitahu kementerian dan jabatan terbabit akan memperbetulkan segala masalah dibangkitkan tetapi masalah yang sama turut diulangi jabatan lain,” katanya.

Beliau menambah, PAC juga akan melihat masalah kutipan cukai oleh Lembaga Hasil Dalam Negeri (LHDN) dan Kastam Diraja Malaysia (KDRM) yang masing-masing mencécah RM11 bilion dan RM368 juta.